

30/06/2001

Isu tuntutan tidak gugat hubungan KL-Manila

KUALA LUMPUR, Jumaat - Filipina dan Malaysia tidak harus menjadikan tuntutan wilayah, khususnya terhadap Sabah, sebagai isu utama dalam hubungan kedua-dua negara, kata bekas presidennya, Fidel Ramos.

Sebaliknya, Ramos berkata, kedua-dua negara harus menghidupkan kembali hubungan dalam kerangka kerjasama serantau untuk memajukan ekonomi masing-masing termasuk dalam wilayah yang dipertikaikan bagi manfaat rakyat.

Katanya, isu tuntutan wilayah bukan penghalang kerjasama ekonomi kerana di seluruh dunia banyak tuntutan wilayah gagal diselesaikan, termasuk isu Spratly yang turut membabitkan Malaysia dan Filipina.

"Oleh itu, jangan jadikan ia isu utama dalam hubungan Malaysia dan Filipina. Kita perlu bekerjasama untuk memajukan ekonomi masing-masing.

"Biar kita melihat kepada peluang yang ada, bukan perbezaan," katanya. Ramos berada di sini untuk menghadiri Kongres Pembangunan Ekonomi Sedunia.

Bekas presiden Filipina itu diminta mengulas pendirian Manila berhubung tuntutan wilayah yang membabitkan Malaysia.

Semalam, Mahkamah Keadilan Antarabangsa (ICJ) di The Hague mendengar permohonan Manila untuk mencelah kes tuntutan Indonesia terhadap kedaulatan Pulau Sipadan dan Ligitan daripada Malaysia.

Ramos menjelaskan, permohonan Manila itu bukan tuntutan Filipina terhadap wilayah di Malaysia tetapi hanya celahan yang dibenarkan di bawah peraturan ICJ bagi melindungi kepentingan negara itu.

Ditanya mengapa Filipina terus membangkitkan isu tuntutan terhadap Sabah, Ramos berkata media asing memainkan isu itu, bukan kerajaan Filipina.

"Ia bukan bermula daripada kita tetapi daripada akhbar. Kadang kala penulis asing menulis mengenai perkara itu," katanya.

Ramos juga berkata, dalam lawatan ke sini pada 1993, beliau dan Datuk Seri Dr Mahathir Mohamad bersetuju mengadakan kerjasama ekonomi dalam kerangka Kawasan Pertumbuhan Asia Timur Brunei-Indonesia-Malaysia-Filipina (BIMP-EAGA).

"Tetapi struktur kerjasama itu hilang akibat krisis ekonomi. Sekarang adalah masanya untuk menghidupkan semula kerjasama itu," katanya.

(END)